

Uunga siunnersuut:

Qilalukkanik qaqortanik qernertanillu illersuineq piniarnerlu pillugit Namminersorlutik Oqartussat nalunaarutaat

Piniarnek aallaaniarnerlu pillugit Inatsisartut inatsisaanni nr. 34, juunip 13-iat 2023-imeersumi § 2, imm. 3, § 6, imm. 2, § 13, imm. 6, § 15, imm. 1, §§ 19-20, § 22, imm. 8, § 23, imm. 4, § 24, imm. 1-2, § 25, imm. 4-5 aamma imm. 7, §§ 26-29, § 34, imm. 5, § 35, imm. 2, § 38, § 39, imm. 3, § 44, imm. 4, §§ 45-46 naapertorlugit aalajangersarneqarpoq:

Kapitali 1

Atuuffia

§ 1. Nalunaarummi uani Kalaallit Nunaata nunataani aalisarnikkullu oqartussaaffigisaani qilalukkanik qaqortanik (*Delphinapterus leucas*) aamma qilalukkanik qernertanik (*Monodon monoceros*) illersuineq piniarnerlu pineqarpoq.

Kapitali 2

Nassuiaatit

§ 2. Nalunaarummi matumani uku imatut paasineqassapput:

- 1) Ataatsimoorluni piniarnek: piniarnek piniartunit 2-nit amerlanerusunilluunniit ingerlanneqartoq.
- 2) Sassat: qilalukkat qaqortat qernertalluunniit sikumi ammalatami mattussaasimasut taamaalillutillu uumallutik nammineerlutik aniguisinnaanngitsut.
- 3) Ileqqutoqqat atorlugit piniarnek: qilalugarniarnek angallat, qajaq imaluunniit qimusseq assartuutitut atorlugu, kiisalu piniutit assersuutigalugu unaaq.
- 4) Siloq: qilalugaq qaqorta qernertarlunniit toqungasoq immami sissamiluunniit nassaarineqartoq.

Kapitali 3

Eqqissisimatitsineq

§ 3. Qilalukkat qaqortat qernertallu nunami aalisarnikkullu imartami Kalaallit Nunaata oqartussaaffigisaani tamani eqqissisimatitaapput, § 4-mi taaneqartut kisiisa pinnagit.

Imm. 2. Qilalukkat qaqortat qernertallu piaqqisartillugit arnavissat piaraalluunniit pisarineqaqqusaanngillat.

Imm. 3. Imm. 1-imi aalajangersagaq sassanut atuutinngilaq.

Kapitali 4

Piniagassanut pisassiissutinik aalajangersaaneq

§ 4. Naalakkersuisut qilalukkanik qaqortanik qernertanillu uumasogatigiinnut ataatsinut immikkut ukiumut ataatsimut imaluunniit ukiunut arlalinnut pisassiissutininik aalajangersaasinnaapput. Pisassiissutininik aalajangersaaneq makkua eqqarsaatigalugit pissaaq:

- 1) Nunani tamalaani isumaqatigiissutit atsiorneqarsimasut pisuussutit piujuartinnissaat amerliartornissaallu siunertaralugu,
- 2) piniartut atuisullu ilisimasaat,
- 3) ilisimatuussutsikkut siunnersuutit, aamma
- 4) kommuninik Piniarneq pillugu Siunnersuisoqatigiillu ilaasortaanik tusarniaaneq.

Imm. 2. Pisassiissutininik taakkununnгалu piumasaqaatinik aalajangersaaneq pillugu nalunaarut Naalakkersuisut nittartagaatigut aamma tusagassiuutit aqutigalugit tamanut saqummiunneqassaaq.

Imm. 3. Qilalukkanik qaqortanik qernertanillu piniarnermi ukioq pisassiiffik tassaavoq Januarip 1-ianiit – Decembarip 31-anut ullut taaneqartut ilanngullugit.

Kapitali 5

Tusarniaaneq aamma piniagassanut pisassiissutininik agguaassineq

§ 5. Piniarneq pillugu Siunnersuisoqatigiit kommuninillu tusarniaareernerup kingornatigut piniakkanut pisassiissutininik agguaassineq Naalakkersuisunit suliarineqassaaq.

Imm. 2. Nunap immikkoortuini killeqarfup iluani qilalukkanut qaqortanut qernertanulluunniit piniagassatut pisassiissutit, kommunikkaarlugit, ingerlatsivikkaarlugit imaluunniit nunaqarfikkaarlugit Naalakkersuisut aalajangersaasinnaapput.

Imm. 3. Nunap immikkoortuini uumasogatigiit killeqarfiusut iluanni qilalukkanik qaqortanik imaluunniit qilalukkanik qernertanik aqutsiveqarfimmi unioqqutitsisumik piniartoqartoq paasineqarpat Naalakkersuisoq ukiumi pisassiiffiusumi imaluunniit ukiumi pisassiiffiusumi tulluuttumi kommunimut pisassiissutininik appaasinnaavoq takuuk imm. 2.

Imm. 4. Qilalukkanik qaqortanik qernertanilluunniit nunap immikkoortuata ataatsip killeqarfiata iluani pisassiissutit atunngitsuukkat pisassiissutinut tamarmiusunut nunap immikkoortuani pineqartumi ukiup pisassiiffiusup tullianut nuunneqarsinnaapput. Pisassiissutininik atorneqanngitsoortunik nuusseriaaseq tassaavoq ukiumiit ukiumut amerliartuutaanngitsumik nuussineq.

Kapitali 6

Piniagassat killeqarfii aallaavigalugit piniarfinnik aalajangersaaneq

§ 6. Piniagassat nunap immikkoortuininik killeqarfeqarput nassuiarneqarlutillu ilanngussaq 2-mi qilalukkanut qernertanut aamma qilalukkanut qaqortanut ilanngussaq 3-mi.

Imm. 2. Uumasogatigiit nunap immikkoortuini qanoq killeqarfeqarnerat pillugu ilaatigut ilisimatuussutsikkut ilisimasat nutaanerpaat tunngavigalugit piniarfissat aalajangersarneqassapput.

Imm. 3. Nunap immikkoortuini piniarfiit killeqarfiusut aalajangikkat akimorlugit piniartoqaqqusaanngilaq, ilanngussaq 2 aamma 3 takuuk.

Kapitali 7

Piniarsinnaatitaasut, akuersissutitik tunniussineq agguassinerlu

§ 7. Nalunaarummi pineqartut naapertorlugit akuersissutitik pigisaqartut kisimik qilalukkanik qernertanik imaluunniit qaqortanik pisaqarsinnaapput. Tamanna aamma ataatsimoorluni piniarnermi atuuppoq.

Imm. 2. Akuersissut inummut atiatigut taasamut taamaallaat atuuppoq allanullu tunniunneqarsinnaanani imaluunniit tuniniarneqassanani.

Imm. 3. Akuersissut ataaseq qilalukkamik ataatsimik pisaqarnissamut periarfissiivoq, piniarfimmi ukiumilu pisassiiffiusumi akuersissummi allassimasumi.

Imm. 4. Akuersissut piniarsinnaanermullu allagartaq atuuttoq piniarnermi aallaaniarnermilu nassarneqartassaaq nakkutilliinermullu atatillugu politiit, piniarnermik aalisarnermillu nakkutilliisut, taakku ikiortaasa imaluunniit inuit tamatumunnga piginnaatitaasut piumasaqarnerisigut takutinneqartassalluni. Akuersissut elektroniskimik takutinneqarsinnaavoq, pdf-itut imaluunniit assilisaq erseqqarissoq.

§ 8. Nunap immikkoortuani uumasogatigiinnut qilalukkanut qaqortanut qernertanullu pisassiissutitik Naalakkersuisut aalajangersaanerisa iluanni qinnuteqarneq malillugu Kommunalbestyrelsi qinnuteqartunut ataasiakkaanut ataatsimoorlunilu piniarnissamut akuersissutitik tunniussisassaaq.

Imm. 2. Akuersissutitik agguassinermit peqataasinnaajumalluni piffissami qinnuteqaateqarfiusussami aamma piniarnerup nalaani qinnuteqartoq:

- 1) Inuussutissarsiutigalugu piniarsinnaanermut allagartamik atuuttumik imaluunniit sunngiffimmi piniarsinnaanermut allagartamik atuuttumik peqassaaq.
- 2) Aqutsiveqarfimmi akuersissutip tunniunneqarfigisaani atuuttumik najugaqartutut inuit nalunaarsorsimaffianni nalunaarsorsimassaaq.
- 3) 15-inik ukioqalereersimassaaq.

Imm. 3. Akuersissummik tunniussinermiut peqatigitillugu kommunalbestyrelsip pisaqarsimanermut nalunaaruteqarnermi immersugassaaq akuersissummik pissarsisumut tunniutissavaa. Pisaqarsimanermut nalunaaruteqarnermi immersuiffissaaq nalunaarummi ilanngussaaq 1-imi takuneqarsinnaavoq.

Imm. 4. Kommunalbestyrelsi piniartumut ataatsimut akuersissummik 1-iinnaangitsumik tunniussisinnaavoq.

§ 9. Kommunalbestyrelsi nunaqarfinni ataasiakkaani aqutsisut, najukkanilu aalisartut piniartullu peqatigiiffii kiisalu sunngiffimmi piniartartut peqatigiiffii tusarniareerlugit kommunip aamma aqutsiveqarfiit qilalukkanik qaqortanik qernertanillu pisassiissutaannik inuussutissarsiutigalugu piniartunut aamma sunngiffimmi piniartartunut agguassinissaaq pillugu piumasaqaatinik aalajangersaassaaq, pisassiissutitik agguassinissaaq sioqqullugu.

Imm. 2. Piniarneq aallartitsinnagu Kommunalbestyrelsip pisassiissutit aamma akuersissutit Aalisarnermut Piniarnermullu Naalakkersuisoqarfimmit tunniussat aallaavigalugit aqutsiveqarfinniittuni illoqarfinnut nunaqarfinnullu tamanut agguaateriissavai.

Imm. 3. Kommunalbestyrelsi inuussutissarsiuutigalugu piniartunut aamma sunngiffimmi piniartartunut ataatsimut piniaqatigiinnissamut akuersisummik tunniusseqqusaanngilaq.

Imm. 4. Kalaallit Nunaata kitaani aqutsiveqarfinni qilalukkanut qaqortanut qernertanullu pisassiissutit 10 procentii angullugit sunngiffimmi piniarnermut allagartalinnut tunniunneqarsinnaapput, Naalakkersuisut allatut aalajangersimanngippata ukiumi aalajangersimasumi taaneqartumi.

Imm. 5. Tunumi aqutsiveqarfinni qilalukkanut qaqortanut qernertanullu pisassiissutit 15 procentii tikillugu sunngiffimmi piniarnermut allagartalinnut tunniunneqarsinnaapput, Naalakkersuisut allatut aalajangersimanngippata ukiumi aalajangersimasumi taaneqartumi.

Imm. 6. Pisassiissutit aalajangerneqarnikut aqutsiveqarfinnut agguaanneqareerpata kommunalbestyrelsi Aalisarnermut Piniarnermullu Naalakkersuisoqarfimmut kingusinnerpaamik ullorsiutit malillugit ullut 7-it qaangiuppata ilisimatitsissaaq.

§ 10. Kommunalbestyrelsi kommunimi ileqqoreqqusakkut ataatsimoorluni piniarneq pillugu malittarisassanik aalajangersaasinnaavoq. Ataatsimoorluni piniarnermi pisassiissutinik sippuinnginnissaa kommunalbestyrelsimit imaluunniit taamaasiorsinnaanissamut piginnaatinneqarsimasunit qulakkeerneqassaaq.

Imm. 2. Ataatsimoorluni piniaqatigiinneq kisimi inuussutissarsiuutigalugu piniarnermut allagartalinnit imaluunniit sunngiffimmi piniarnermut allagartalinnit ingerlanneqarsinnaavoq.

Imm. 3. Ataatsimoorluni piniartoqassatillugu piniarnermut naalakkatut toqqarneqartumut akuersissuteqartoqassaaq. Ataatsimoorluni piniarnermut naalagaq peqataasullu sinnerisa aqqi inuuiilu akuersisummumut allanneqassapput.

Imm. 4. Kommunalbestyrelsi pisassiissutigineqartunik nakkutilliissaaq, pisassiissutigineqartunik atuineq malittareqqissaarneqassaaq piniarnerlu ingerlaannartumik tusagassiuutitut nalunaaruteqarnikkut unitsinneqassalluni, kommunimut pisassiissutit imaluunniit aqutsiveqarfimmut pisassiissutit tamakkerneqarpata.

Imm. 5. Kommunalbestyrelsi kommunimut pisassiissutigineqartut imaluunniit aqutsiveqarfimmut pisassiissutigineqartut tamakkerlugit pisarineqarpata ingerlaannaq tusagassiuutitut nalunaarutip assinga nassiullugu Aalisarnermut Piniarnermullu Naalakkersuisoqarfimmut saaffiginissaaq.

§ 11. Kommunalbestyrelsi pisaqarnissamut akuersissutit aaneqarnissaannut piffissamik killiliisinnaavoq.

Imm. 2. Piniartut akuersisummik tunineqarsimasut akuersisummilli atuisinnaanngitsut imaluunniit atuerusunngitsut, piaarnerpaamik akuersissut atorineqanngitsut kommunalbestyrelsimut imaluunniit taamaasiorsinnaanissamut piginnaatinneqarsimasunut utertissavaat.

Imm. 3. Akuersissutit piffissaliussatut killiliussap iluani aaneqanngitsut, sumiiffimmi aqutsiviup iluani kommunip pisortatigoortumik utaqqisunut allattorsimaffik naapertorlugu agguaateqqinneqarsinnaapput.

Imm. 4. Akuersissutit kommunalbestyrelsip piffissaliussaa naapertorlugu atorneqarsimanatillu aaneqarsimanngitsut agguanneqaqqissinnaapput, tamatumalu kingornatigut siusinnerusukkut akuersisummik piginnittumit atorneqarsinnaassanatik.

Imm. 5. Tamatuma kingornatigut akuersissutit kommunip iluani immikkut piniakkanut pisassiissutit aalajangiunneqareernikut aamma kommunip ileqqoreqqusaliaanut tunngatillugu aalajangersakkat naapertorlugit agguaateqqinneqassapput. Agguaasseqqinnermut piffissaliussaq kommunalbestyrelsip nalunaarutigissavaa aamma tamanna akuersisummi takuneqarsinnaassaaq.

Imm. 6. Kommunini aamma sumiiffinni aqutsivinni pineqartuni najukkani aalisartut piniartullu peqatigiiffinik tusarniaareernerup kingornatigut agguaasseqqinneq ingerlanneqassaaq.

Kapitali 8

Piniariaatsit

§ 12. Qilalukkanik qaqortanik qernertanillu piniarnermi taamaallaat qoorortuut akuerisaasut minnerpaamik .30-06 (7,62x63 mm)-mik sulloqqortussusillit atorneqassapput. Qoorortuunik eqittaannartakkanik atuineq inuussutissarsiutigalugu piniarnermut allagartallinnut taamaallaat ajornartitaanngilaq.

Imm. 2. Ajornartinnagu qilalugaq qaqortaq qernertarlunniit nangillugu toqussutissaanik aallaaneqartinnagu unaamik naalillugu annaanaveerneqassaaq.

Imm. 3. Qassusersorluni piniarneq kisimi akuerisaavoq kommunimi ileqqoreqqusaaq atuutsinneqalereerpat. Qilalukkanik qaqortanik qernertanillu piniarnermut atatillugu qassutitik nigartap tamakkerluni iluatungimigut nerutussusianik minnerpaamik 380 mm-inik atuinissaaq, taamaallaat Qaanaap aqutsiveqarfiani kiisalu Tunumi sumiiffinni aqutsiveqarfinni ajornartitaanngilaq, takuuk ilanngussaaq 2, imm. 2-3 aamma imm. 7-9 kiisalu ilanngussaaq 3 imm. 2.

Imm. 4. Qassutit atorneqartut piginnittup aqqanik nalunaaqutserneqarsimassapput, minnerpaamillu ullormut ataasiarlugu alakkarneqartassallutik piniarnermilu atorneqareernermit kingornatigut qaqinneqassallutik.

Imm. 5. Qassutit atorlugit qilalukkanik qaqortanik qernertanillu piniarnermi, qilalugaq qaqortaq qernertarlunniit qassuteqarfimmut apuunnermi sulii uumasooq aallaaneqarluni imaluunniit naalinneqarluni toqunneqassaaq.

Imm. 6. Aqutsiveqarfinni qassusersorluni qaqortanik qernertanillu qilalugarniarfiusartuni kommunalbestyrelsi qassusersorluni qilalugarniarnermut tunngasumik ileqqoreqqusaliussaaq.

§ 13. Timmisartut, qulimiguullit qamutillu motoorinik ingerlatillit suugaluartullunniit qilalukkanik qaqortanik qernertanillu piniarnermut atatillugu imaluunniit piniarfimmut tassanngaanniillu angallatitut atoqqusaanngillat.

§ 14. Taamaallaat angallatit, angallatip angissusianut uppersarsaat malillugu 15 meterinik takissuseq tamakkerlugu (t.t.) takitigisut taassuminngaluunniit mikinerusut, qilalukkanik qaortanik qernertanilluunniit piniarnermut atatillugu atorpeqassapput.

Ungusineq

§ 15. Ungusilluni piniarnerit tamarmik soorlu sinerissamut patugullugit aninaveersitsineq imaluunniit sinerissamut, kangerlummuk sikup sinaavanulluunniit tatisillugit assiinerit inerteqqutaapput.

Kapitali 9

Akuerineqareernerup kingornatigut toqutsineq

§ 16. Aalisarnermut Piniarnermullu Naalakkersuisoqarfimmit akuerineqareernikkut qilalukkanik qaortanik qernertanilluunniit annertuumik ikilernerqarsimasunik, qilalukkanik qaortanik qernertanilluunniit aalisarnermut atatillugu qassutinut imaluunniit aalisarnermut atortunut allanut nuiussimasunik toqutsisoqarsinnaavoq.

Imm. 2. Qilalukkamik qaortamik qernertanilluunniit akuerisaasumik pisaqareernerup kingunerisaanik paasineqarpat pisaq nappaammik imaluunniit assigisaanik pissuteqartumik inunnut nerisassatut naleqquttuunngitsoq, tamatuma kingunerisaanik Aalisarnermut Piniarnermullu Naalakkersuisoqarfiup pisap toqunneqartutut isigineqarnera akuerisinnaavaa. Akuersissut atorpeqarsimappat taanna atuutiinnassaaq.

Imm. 3. Imm. 1 naapertorlugu piniakkat toqunneqartut najukkami innuttaasunut agguanneqarsinnaapput, pisaq nerisassatut naleqquppat. Saarngit aamma kigutit (tuugaaq) Aalisarnermut Piniarnermullu Naalakkersuisoqarfiup pigisarai, toqunneqarneratalu kingornatigut kingusinnerpaamik ullorsiutit malillugit ullut 14-t qaangiunneranni uunga Postboks 269, 3900 Nuuk, nassiunneqassallutik. Nassitsinerimut atatillugu aningaasartuutit Aalisarnermut Piniarnermullu Naalakkersuisoqarfiup akilissavai.

Kapitali 10

Sassat

§ 17. Sassanik naammattuuisoqarpat tamanna najukkami oqartussaasumit Aalisarnermut Piniarnermullu Naalakkersuisoqarfimmut uppersarsarneqassaaq. Sassineq Naalakkersuisoqarfimmit akuerineqaaqaarani aallartinneqassanngilaq, aatsaallu nalilernerqarpat qilalukkat aniguisinnaanerit ilimananngitsoq. Akuersissut kommunalbestyrelsimut imaluunniit sumiiffimmi aqutsiviusumi najukkani oqartussaasunut nalunaarutigineqassaaq, tamatuma kinguinngua nunaqarfiit illoqarfiillu pineqartut ilisimatinneqassallutik.

Imm. 2. Kikkulluunniit inuussutissarsiutigalugu piniarsinnaanerimut imaluunniit sunngiffimmi aallaaniarsinnaanerimut atuuttumik allagartallit sassinerimut peqataasinnaapput.

Sassinermi pisat piniartut ataasiakkaat qilalukkanik qaqortanik qernertanilluunniit pisassaannit imaluunniit sumiiffimmi aqutsiviusumi pisassanit ilaatinneqassanngillat.

Imm. 3. Sassinermi pisat ima amerlatigisinnaapput kingusinnerpaamik sassinerup naammassinerata kingornatigut pisat tamakkerlutik qularnaatsumik qimussimik angallanneqarsinnaassallutik.

Imm. 4. Taamaattorli pisuni immikkut ittuni silap sikullu pissusii pissutigalugit pisat tuaviortumik immikkullu ittumik angerlaassorneqartariaqalersillugit sassivimmiit qamuteralaat angerlaassuinnermi atorneqarnissaannut kommunalbestyrelsi immikkut akuersissuteqarsinnaavoq.

§ 18. Neqi, mattak, tuugaaq orsorlu nalunaaqutsikkat qilalukkallu pitutat piginnittui akuersitinnagit nikisinneqassanngillat, aatsaallu taamaaliortoqarsinnaavoq kommunalbestyrelsi imaluunniit sumiiffimmi aqutsiviusumi najukkami oqartussaasut sila pissutigalugu pisat angerlaannissaannut tunngatillugu piffissamik aalajangiisimappata piffissaliussarlu taanna eqqortinneqarsimanngippat.

Kapitali 11

Pilanneq

§ 19. Qilalugaq nunamut sikumulluunniit qaqiinnavillugu pilanneq aallartinneqassaaq. Nerisassartai atorneqarsinnaasullu allat tamarmik angerlaanneqarlutilluunniit qimatulineqassapput. Pilaffiusimasooq perlukuiarneqarsimassaaq.

Imm. 2. Iliveqqiviit piniarnermut aalisarnermullu nakkutilliisumut qaninnerpaamut kommunilluunniit allaffianut nalunaarutigineqassapput.

Imm. 3. Taamaallaat angallatit, angallatip angissusianut tamakkiisumut uppersarsaat malillugu 15 meterinik t.t.-mik takissusillit taannaluunniit inorlugu angissusillit angallatip nammineq pisaanik pilaffigineqarsinnaapput.

Kapitali 12

Saniatigut pisarisuukkat, annaasat pissatallu

§ 20. Qilalukkat qaqortat qernertalluunniit saniatigut pisarisuukkat tuniniaqqusaanngillat kommunillu imaluunniit sumiiffiup aqutsiviusup pisassaanit ilanngaatigineqassallutik. Saniatigut pisarisuukkat Aalisarnermut Piniarnermullu Naalakkersuisoqarfimmut nalunaarutigineqassapput.

Imm. 2. Qilalukkanik qaqortanik qernertanilluunniit pissaasoqartillugu sapinngisamik piaarnerpaamik piniarnermik aalisarnermullu nakkutilliisoq kommunilluunniit allaffia tamanna pillugu attavigineqassaaq aamma pissaaneq kommunimi imaluunniit sumiiffimmi aqutsiviusumi pisassiissutinit ilanngaatigineqassanngilaq.

Imm. 3. Silumik nassaartoqartillugu Aalisarnermut Piniarnermullu Naalakkersuisoqarfimmut nalunaartoqassaaq. Aalisarnermut Piniarnermullu Naalakkersuisoqarfiup siloq qanoq pineqassanersoq aalajangissavaa.

Kapitali 13

Tunisinermi pisinermilu piunasaqaatit

§ 21. Qilalukkat qaqortat qernertallu pisat, tassanilu ilaapput akuerineqaaqaareersumi sassinermi pisat, tunineqassanngillat kommunimi imaluunniit nunaqarfimmi allaffik akuersissummik naqissusiinikkut ullulerlugu pisamik nalunaarsuereertinnagu, taamaattorli imm. 2 takuuk.

Imm. 2. Taamaattoq kommunip allaffia nunaqarfimmiluunniit allaffiup ammanerisa avataatigut tuniniaaneq ingerlanneqarsinnaavoq, allaffik ammarniariartoq nalunaarsuisoqarpat.

Imm. 3. Pisarineqartumit taassumaluunniit ilaanit tunisineq imaluunniit pisineq aatsaat pisinnaavoq akuersissummik piginnittup akuersissutip assilinerani uppersarlungu atsiorpagu. Taanna tuniniaasoqartillugu qinnuigineqarnikkut takutinneqarsinnaassaaq. Assilinerani takuneqarsinnaassaaq pisap kommunimi oqartussaasumit nalunaarsorneqarsimanera.

Imm. 4. Qilalukkat qaqortat qernertalluunniit unioqqutitsinikkut pisarineqarsimasut mattaannik, neqaannik aamma kigutaannik (tuugaavinik) pisineq, tunisineq imaluunniit pissarsineq inerteqqutaavoq.

Tunisineq

§ 22. Qilalukkat qaqortat qernertallu neqaannik, orsuinik, mattaannik, qilalukkat qaqortat qernertallu ilaannik kiisalu qilalukkat qernertat tuugaavinilluunniit angallatit tunitsivittut atorneqassanngillat.

Imm. 2. Tunitsivinnut akuerisaasunut inuussutissarsiutigalugu piniartut, inuussutissarsiutigalugu piniarnermut atuuttumik allagartallit akuersissummillu naqissusersimasumik takutitsisinnaasut kisimik pisanik tunisisinnaapput.

Imm. 3. Naalakkersuisut kommuninut pisassiissutini pisassiissutinik tunisassanik aalajangersaasinnaapput, kommunini piniarsinnaanermut pisassiissutinik tunineqarsimasuni.

Imm. 4. Qilalukkanut qaqortanut qernertanullu tunisinissamut atatillugu pisassiissutinik aalajangersaasoqarsimatillugu, tunitsiviit uumasogatigiit 2-k immikkoortillugit ullormut tunisat annertussusiat pillugu paasissutissanik Aalisarnermut Piniarnermullu Naalakkersuisoqarfimmut nassitsissapput, tunisinerup akuerisaanerata atuunnerani.

Imm. 5. Aalisarnermut Piniarnermullu Naalakkersuisoqarfiup kommunimi pineqartumi imaluunniit sumiiffimmi aqutsiviusumi tunitsivimmut tunisinerup qaqugu uninnissaa nalunaarutigissavaa.

Tuniniaaneq

§ 23. Atuisussamut, taassuma ataani igaffissuaqarfinnut, neriniartarfinnut, sullissiveqarfinnut assigisaannulluunniit, kiisalu najukkani kalaalimineerniarfinniit

tuniniaanerit aamma inuinnarnut tunisaqartarnerit taamaallaat inuussutissarsiutigalugu piniartunit inuussutissarsiutigalugu piniarnermut allagartamik atuuttumik pigisaqartumit isumagineqarsinnaavoq aamma akuersissummi § 21 imm. 1 naapertorlugu naqissuserneqarsimasunik takutitsisinnaasumit, imaluunniit taamaasiorsinnaanissamut piginnaatinneqarsimasunit qinnuigineqarnerminni uppersaatinik takutitsisinnaasunit.

Imm. 2. Suliffeqarfinnut toqqaannartumik tuniniaaneq taamaallaat inuussutissarsiutigalugu piniartunit inuussutissarsiutigalugu piniarnermut allagartamik atuuttumik peqartumit isumagineqarsinnaavoq aamma akuersissummik allagartamilluunniit § 21-mi imm. 1 aamma 2 naapertorlugit naqissuserneqarsimasunik takutitsisinnaasumit, imaluunniit taamaasiorsinnaanissamut piginnaatinneqarsimasunit qinnuigineqarnerminni uppersaatinik takutitsisinnaasunit.

Imm. 3. Igaffissuaqarfiit, neriniartarfiit, sullissiveqarfiit assigisaallu imm. 1-mi taaneqartut, kiisalu suliffeqarfiit imm. 2-mi taaneqartut uppersarsinnaassavaat neqi, tuugaaq, orsoq, mattallu inuussutissarsiutigalugu piniartunit atuuttumik inuussutissarsiutigalugu piniarnermut allagartalinnaat akuersissutilluunniit pisisimanertik uppersarsinnaassavaat, § 21, imm. 3 naapertorlugu.

Imm. 4. Imm. 1-miit 3-mut naapertorlugit uppersaat tassaavoq akiligassaq atsiorneqarsimasooq inuussutissarsiutigalugu piniarnermut allagartamik atuuttumik nuutinneqarsimasumik naqissuserneqarsimasumik akuersissutalik allagartalilluunniit.

Imm. 5. Taamaallaat inuussutissarsiutigalugu piniarnermut allagartamik atuuttumik aamma akuersissummik naqissusikkamik peqartut, takuuk § 21, imm. 1, qilalukkat qernertat tuugaavinik imaluunniit qilalukkap qaqortap kigutaanik taassuminnga pisamik tunisisinnaapput. Taamaattoq sanalukkanik eqqumiitsulianut atatillugu tuniniaaqinneq akuerisaavoq. Allagartaq akuersissummiit normutalik tuugaamut ilivitsumut allunaasartalerlugu ikkunneqassaaq.

Kapitali 14

Nalunaaruteqarneq nakkutilliinerlu

§ 24. Qilalukkanik qaqortanik qernertanillu pisat, saniatigut pisarisuukkat, annaasat aallaarsarisallu sapinngisamik piaarnerpaamik kommunimut angerlarsimaffigisamut, illoqarfigisamut imaluunniit nunaqarfinni allaffimmut nalunaarutigineqassapput. Nalunaaruteqarneq piniartumit pisaqartumit namminermit isumagineqassaaq, sassinermili pisat, inuussutissarsiutigalugu piniartut eqqarsaatigalugit najukkami Aalisartut Piniartullu Peqatigiiffiannit aamma sunngiiffimmi aallaaniartartut pineqartillugit kommunalbestyrelsimit/nunaqarfinni aqutsisunit nalunaarutigineqassallutik. Ataatsimoorluni piniarnermi pisat nalunaarutigineqassapput taamaallaat ataatsimoorluni piniarnermut atatillugu aqutsisussatut toqqarneqarsimasumit.

Imm. 2. Pisamik nalunaaruteqarnermi immersugassaq nalunaarummi ilanngussaq 1 atorineqassaaq. Qilalukkanut pisanut, aallaarsarisamut annaasanullu ataasiakkaanut tamanut immersuiffissaq ataaseq immersorneqassaaq, taamaattorli sassinermi pisat tamarmik immersuiffissami ataatsimi nalunaarutigineqassallutik. Uiaq pisarineqartoq qilalukkamik

qaqortamik qernertamilluunniit inersimasumik ataatsimik amerlassusiliinertut atuuppoq. Akuersissut kommunimit naqissusikkap assilinera pisanik nalunaarutiginninnermi ilanngunneqassaaq.

Imm. 3. Kommunalbestyrelsen nalunaarummi ilanngussami 1-imi immersuiffiit kiisalu § 21, imm. 1 naapertorlugu akuersissutit naqissusikkat assingi tiguneqarnerisa kinguinngua piaarnerpaamik Aalisarnermut Piniarnermullu Naalakkersuisoqarfimmut nassiutissavai.

§ 25. Inuussutissarsiutigalugu piniarnermut allagartaq atuuttoq imaluunniit sunngiffimmi piniarsinnaanermut allagartaq atuuttoq aamma akuersissut imaluunniit tunisisinnaanermut akuersissut sukkulluunniit politiit, piniarnermik aalisarnermillu nakkutilliisut tamatumunngalu piginnaatitaasut piumasaqarnerisigut takutinneqartassaaq.

Kapitali 15

Misissugassat nalunaaqutsersuinerlu

§ 26. Aalisarnermut Piniarnermullu Naalakkersuisoqarfik kinaluunniit qilalukkamik qaqortamik qernertamilluunniit pisaqarsimasooq, pisussaatisinnaavaa pisap mattaanik, neqaanik anginngitsumik imaluunniit kigutaata ilaanik misissugassanik kommunip allaffianut tunniussinissamik, tassani pisap suunera, ulloq sumilu pisarineqarsimanera pillugu ilisimatitsissutigalugu. Misissugassat Pinngortitaleriffiup plastik-imik puussarititamat tunniunneqarsimasumut asiunaveersaammik imerpalasortalimmut imaluunniit allakkaq puuanut ikineqassapput. Pisamat nalunaarutip assilinera ilanngutissaaq, erseqqissaatigalugu assilisaasoq.

Imm. 2. Kommunip allaffiata misissugassat paasissutissallu assilisat tiguneqareernerisa kinguinnguatiigut Pinngortitaleriffik, Box 570, 3900 Nuuk-mut nassiutissavai. Nassiussinermut aningaasartuutit Pinngortitaleriffiup akilissavai.

Imm. 3. Naalakkersuisut qilalukkanut qaqortamik qernertanillu piniarnermut atatillugu piumasaqaatinik aalajangersaasinnaavoq, tassunga ilanngullugu ilisimatuussutsikkut misissuinerlut atugassanik qilalukkaq qaqortap qernertallu ilaanik tunniussisarnissamat.

§ 27. Misissugassanik tigusineq, nalunaaqutsersuineq suliallu allat qilalukkanik uumasunik attuumassuteqartut taamaallaat Pinngortitaleriffimmit ingerlanneqarsinnaapput. Allat Aalisarnermut Piniarnermullu Naalakkersuisoqarfimmut akuersissuteqarnissamik qinnuteqaqqaassapput.

Imm. 2. Imm. 1 naapertorlugu siunertaanngitsumik pisisuukkat Aalisarnermut Piniarnermullu Naalakkersuisoqarfimmut nalunaarutigineqassapput. Aalisarnermut Piniarnermullu Naalakkersuisoqarfiup siunertaanngitsumik pisisuukkat qanoq passunneqassanersut aalajangiiffigissavaa.

Imm. 3. Nalunaaquttat, radiukkat aamma qaammataasakkoortumik nassitsissutit sumi qangalu arferup pisarineqarsimaneranut nassaarineqarsimaneranulluunniit paasissutissartallit uunga nassiunneqartassapput: Pinngortitaleriffik, Postbox 570, 3900 Nuuk. Nalunaarutip assilinera Aalisarnermut Piniarnermullu Naalakkersuisoqarfimmut nassiunneqassaaq.

Kapitali 16

Kommunimi ileqqoreqqusat

§ 28. Kommunalbestyrelsi nunaqarfinni siulersuisunik aamma najukkani aalisartut piniartullu peqatigiiffiannik tusarniaareerluni kommunimi ileqqoreqqusakkoortumik piumasaqaatinik aalajangersaasinnaavoq, § 7-9 aamma §§ 20-27 aalajangersakkanit sukannernerusunik aalajangersarneqarsimasunik.

Imm. 2. Kommunimi ileqqoreqqusat Aalisarnermut Piniarnermullu Naalakkersuisumiit atuutilersinneqassapput.

Kapitali 17

Immikkut akuerineqarneq

§ 29. Aalisarnermut Piniarnermullu Naalakkersuisoqarfik ilisimatusarnermut imaluunniit Kalaallit Nunaanni piniagassanut tunngatillugu isumalluutunik kiisalu assiliinikkut/filmiliornikkut takussutissianik, ilisimatuussutsikkut paasiniaanermut atatillugu atugassanik, nalunaarummi matumani aalajangersakkanik immikkut saneqqutisisoqarnissaanut akuersissuteqarsinnaavoq.

Kapitel 18

Pineqaatissiissutit

§ 30. Kalaallit Nunaannut Pinerluttulerinermi inatsit malillugu akiligassiinermik kinguneqarsinnaavoq:

- 1) Nalunaarummi matumani § 3, imm. 1, § 6, imm. 3, § 7, § 10, imm. 2, , §§ 12-15, § 16, imm. 3, §§ 17-23, aamma §§ 25-26-mik unioqqutitsisoqartillugu imaluunniit unioqqutitsisoqariartillugu
- 2) Pisortanut paasissutissanik eqqunngitsunik paatsiveerussaataasunilluunniit tunniussineq imaluunniit uppersaatinik paasissutissanillu nalunaarummi § 24 naapertorlugit piumasaqaatigineqartunik tunniussinnginneq,
- 3) § 16, imm. 1 aamma § 17 naapertorlugi immikkut akuerisaanermi imaluunniit akuersissummi tunniunneqartumi piumasaqaatinik qaangiiginnaasoqartillugu.

Imm. 2. Nalunaarut manna malillugu kommunit ileqqoreqqusaannik unioqqutitsisoqarsimappat Kalaallit Nunaannut Pinerluttulerinermik inatsit malillugu akiliisitsisoqarsinnaavoq pisarineqartunillu arsaarinnittoqarsinnaalluni.

Imm. 3. Nalunaarut manna malillugu nalunaarutitut allatulluunniit malitassanut aalajangersarneqartut akileeqqusissummik aalajangersaanissamik tunngavissaqartitsippata, akileeqqusissut Kalaallit Nunaannut Pinerluttulerinermik inatsimmi malittarisassat malillugit inatsisitigut inuttut pisinnaatitaaffeqartoq akileeqqusissummik pisussaaffilerneqarsinnaavoq.

Imm. 4. Imm. 1-3 malillugu akiliisitsinernit pineqaatissiissutinit isertitarineqartut Nunap karsianut pisassanngortinneqassapput.

§ 31. Arsaarinnittoqartarnissaq pillugu pinerluttulerinermi inatsimmi aalajangersakkat atuupput.

Imm. 2. Pisarineqartut ilaannik arsaarinnissutigineqartut atornissaat Aalisarnermut Piniarnermullu Naalakkersuisumit aalajangerneqartassaaq.

Kapitali 19

Atuutilersitsineq

§ 32. Nalunaarut ulloq xx. xxxxx 2024 atuutilerpoq.

Imm. 2. Nalunaarutip atuutilernera ilutigittillugu Qilalukkanik qaqortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 3, 27. januar 2017-imeersoq atorunnaarpoq.

Imm. 3. Tunumi Ammassallup aamma Ittoqqortoormiit aqutsiveqarfiini qassusersorluni qernertanik qilalugarniartarnermi ileqqoreqqusaq allanngortinneqarnissami atorunnaarsinneqarnissamiluunniit tungaanut atuutiinnassaaq.

Namminersorlutik Oqartussat, ulloq xx. xxx 2024

Kim Kielsen

Aalisarnermut Piniarnermullu Naalakkersuisoq

Emanuel Rosing